

- प्रधानमंत्री नरेन्द्र मोदी कह्यो—केन्द्र सरकार देश मांय बुनियादी ढांचा रा विकास माथे खास ध्यान दे रही है।
- मुख्यमंत्री अशोक गहलोत न्यायपालिका मांय भ्रष्टाचार ऊं जुडी टिप्पणी माथे राजस्थान हाई कोर्ट मांय लिखित माफी मांगी।
- उत्तर पश्चिम रेल्वे ने त्यौहारी मौसम मांय यात्री गाड़ियां मांय डिब्बां री तादाद बधायी।
- दक्षिण पश्चिम मॉनसून प्रदेश ऊं विदा व्हयो।

000

प्रधानमंत्री नरेन्द्र मोदी कह्यो है के केन्द्र सरकार देश मांय बुनियादी ढांचा रा विकास माथे खास ध्यान दे रही है। वे आज छत्तीसगढ रा जगदलपुर मांय बोल रह्या हा। प्रधानमंत्री कह्यो के लारला नौ साल मांय बुनियादी सुबीतां रा विकास सारू खर्चा बधा र दस लाख करोड़ रुप्या कर दियो ज्यो है। प्रधानमंत्री कह्यो के विकसित भारत रो सपना देश रा हर एक राज्य, जिला अर गांव रे विकसित व्हेवण परां ई पूरो व्हे सकेला। वे कह्यो के लारला नौ साल मांय इस्पात उत्पादन रा हलका मांय भारत ने खुद रे पाण ऊबो करण सारू केई जतन करी ज्या है। प्रधानमंत्री जगदलपुर मांय भारतीय जनता पार्टी री ओर ऊं राख्यी ज्यी आमसभा मांय कह्यो के देश रा साधनां माथे पहलो हक गरीबां रो है।

000

प्रधानमंत्री नरेन्द्र मोदी रो 5 अक्टूबर ने जोधपुर रो दौरा करण रो कार्यक्रम है। ई दौरान वे विकास रा न्यारा—न्यारा काम जनता ने सूपेला अर नुवा कामां री नींव रखेला। वे जनसभा ने ई सम्बोधित करेला। म्हाणा खबरनवीस बतायो के जिला प्रशासन अर भारतीय जनता पार्टी री ओर ऊं प्रधानमंत्री रा दौरा री तैयारियां करी जा रही है।

000

विश्व बैंक चालू माली साल मांय भारत री सकल घरेलू उत्पाद री बधोतरी री रेट 6 दशमलव 3 फीसदी बरकरार राख्यी है। भारत मांय केई बाहरी चुनौतियां रे बावजूद माली बधोतरी री मजबूत रेट ने ध्यान राखता थकां ओ फ़ैसलो करी ज्यो है। विश्व बैंक अप्रैल री रपट मांय साल 2023—24 मांय भारत री माली बधोतरी री रेट रो अनुमान पहली रा 6 दशमलव 6 फीसदी ऊं घटा र 6 दशमलव 3 फीसदी कर दीनो हो।

विश्व बैंक रा भारत रा विकास ऊं जुड़्या नुवा विवरण रे मुजब भारत री माली व्यवस्था रा बारा मांय अंतर्राष्ट्रीय वित्तीय संस्थानां री अर्धवार्षिक प्रमुख रपट रे मुजब मोटी वैश्विक चुनौतियां रे बावजूद भारत साल 2022—23 मांय 7 दशमलव 2 फीसदी री बधोतरी रेट सागे तेजी ऊं बधती खास माली व्यवस्थावां मांय शामिल हो।

000

वित्त मंत्री निर्मला सीतारमण कह्यो है के सरकार किसानां अर कारोबारियां ने सब्सिडी अर नान्हा कारोबारियां ने कर्ज रा तौर ऊं मदद दे रही है। वे आज तमिलनाडू रा कोयम्बतूर मांय क्रेडिट आउट रीच कार्यक्रम रा तैत कर्ज बांट्या। ई मौके वे कह्यो के आकांक्षी जिलां ने हर भांत री सरकारी मदद देवण माथे खास ध्यान दियो जा रह्यो है। मंत्री सीतारमण बतायो के किसान क्रेडिट कार्ड वाळा ई सरकार ऊं कर्ज लेवण सारू अर्जी दे सके है।

000

मुख्यमंत्री अशोक गहलोत न्यायपालिका मांय भ्रष्टाचार ऊं जुडी वां री टिप्पणी माथे राजस्थान हाई कोर्ट मांय लिखित माफी मांगी है। पैली वाळा न्यायिक अहलकार शिवचरण गुप्ता री ओर ऊं दायर करी ज्यी जनहित याचिका माथे आज मुख्य न्यायाधीश न्यायमूर्ति ए.जी. मसीह अर न्यायाधीश न्यायमूर्ति एम.एम. श्रीवास्तव री खंडपीठ सुणवाई कीनी। ई दौरान मुख्यमंत्री री ओर ऊं वकील प्रतीक कासलीवाल जवाब पेश कीनो। वे कह्यो के पैली वाळा केई जज न्यायपालिका मांय भ्रष्टाचार री बात कही है। वां रो जिक करता थकां मुख्यमंत्री आ बात कही ही। अ वां रा खुद रा विचार नी है। न्यायपालिका रा प्रति वां रो पूरो मान है। फेर ई गर वां रा बयान ऊं न्यायपालिका रा मान ने ठेस लागी है तो वे ई सारू बिना शर्त माफी मांगे है। मुख्यमंत्री रा राजस्थान हाईकोर्ट मांय दाखिल जवाब ने रिकॉर्ड माथे लेता थका अदालत ई मामला मांय आगली सुनवाई री तारीख 7 नवम्बर तैय कीनी है। ध्यान जोग है के मुख्यमंत्री कुछ दिन पैली खबरनवीसां सागे बातचीत रे दौरान न्यायपालिका मांय भ्रष्टाचार व्हेवण री बात कही ही।

000

भारतीय जनता पार्टी राज्य मांय आवता विधानसभा चुनाव सारू संकल्प पत्र जारी करण बाबत् जनता री राय लेवेला। ई सारू पार्टी री ओर ऊं काल 'आपणो राजस्थान' सुझाव आपके, संकल्प हमारा' आउटरीच कार्यक्रम सुरू कर्यो जावेला। संकल्प पत्र समिति रा अध्यक्ष अर केंद्रीय मंत्री अर्जुन राम मेघवाल आज भाजपा रा प्रदेश कार्यालय मांय खबरनवीसां सागे बातचीत करता थकां आ जानकारी दीनी। वे कह्यो के पार्टी रा राष्ट्रीय अध्यक्ष जे पी नड्डा काल ई अभियान री सुरूआत करेला। ई सारू पार्टी री ओर ऊं न्यारा-न्यारा जिलां मांय 51 रथ भेज र संकल्प पत्र सारू राय मांगी जावेला। भाजपा रा अध्यक्ष जे पी नड्डा काल आं रथां ने हरी झंडी बता र विहर करेला। मेघवाल कह्यो के विकसित राजस्थान बणावण रा संकल्प सारू पार्टी सगळा तबकां री राय ले र वां ने संकल्प पत्र मांय शामिल करेला।

000

राज्य सरकार 4 जिलां मांय पैनोरमा बणावण सारू 18 करोड़ रुपया री मंजूरी दीनी है। ई रकम ऊं जयपुर मांय स्वामी आत्मारामजी लक्ष्य पैनोरमा अर बीकानेर मांय राव बीकाजी पैनोरमा बणायो जावेला। आं काम मांय 4-4 करोड़ रुपया रो खर्चो आवेला। अजमेर मांय पृथ्वीराज चौहान पैनोरमा अर जैसलमेर रा पोकरण मांय इंदिरा महाशक्ति भारत पैनोरमा बणायो जावेला। आं माथे 5-5 करोड़ रुपया खर्च व्हेला। ए सगळा काम पर्यटन विभाग री ओर ऊं पर्यटन विकास कोष ऊं करवाया जावेला।

000

आवता दिनां त्यौहारां रा सीजन ने ध्यान राखता थकां उत्तर-पश्चिम रेलवे केई रेलगाडियां मांय डिब्बां री तादाद बधायी है। उत्तर पश्चिम रेलवे रा मुख्य जनसंपर्क अधिकारी कैप्टन शशि किरण बतायो के त्यौहारी सीजन मांय मुसाफिरां री आवण-जावण बध जावण ऊं केई रेलगाडियां मांय लम्बी प्रतीक्षा सूची ने ध्यान राखता थकां ओ फ़ैसलो करी ज्यो है।

000

दक्षिण पश्चिम मॉनसून आज प्रदेश ऊं विदा व्हे ग्यो। मौसम विभाग रे मुजब चौमासा री बिरखा औसत मियाद ऊं तीन दिन मोडी बंद व्ही है। मौसम केन्द्र जयपुर रा निदेशक राधेश्याम शर्मा बतायो के दक्षिण-पश्चिम मॉनसून री वापसी री लकीर ई बगत गुलमर्ग, धर्मशाला, मुक्तेश्वर, पीलीभीत, औराई, अशोक नगर, इन्दौर, बडौदा अर पोरबन्दर ऊं निकळ रही है। ई बीचे प्रदेश रा कुछ हलकां मांय ठण्ड महसूस व्हेवण लाग्यी है। सिरोही, सीकर, अलवर, बारां, भीलवाडा अर हनुमानगढ समेत केई जिलां मांय पारो 20 डिग्री सेल्सियस या कम दर्ज व्हेवण लाग्यो है। माउंट आबू मांय रात रो तापमान 17 डिग्री सेल्सियस ताई आ ग्यो है। मौसम विभाग आवता दिनां मौसम साफ रेहवण रा आसार जताया है।

000

दौसा जिला रा नांगल राजावतान मांय आज मेरी माटी मेरा देश अभियान रा तहत कलश यात्रा निकाळी ज्यी। ई सागे ई पौधा रोपी ज्यो। नेहरू युवा केंद्र संगठन रा राज्य निदेशक महेंद्र सिंह सिसोदिया पौधा रोपण रा कार्यक्रम री सुरूआत कीनी। वे पंच प्रण री शपथ ई दिरायी।

000

राज्य स्तर री खो-खो होड आज बूंदी जिला रा हिंडौली मांय सुरू व्ही। होड रो उदघाटन खेल राज्य मंत्री अशोक चांदना कीनो। 17 अर 19 साल आयु वर्ग मांय व्हे रही ई होड मांय प्रदेश रा न्यारा-न्यारा जिलां ऊं 106 टीमां शिरकत कर रही है। 17 साल उम्र ताई री छात्रावां री राज्य स्तर री खो-खो होड बाड़मेर मांय सुरू व्ही। राजस्थान गौ-सेवा आयोग रा अध्यक्ष मेवाराम जैन इण री सुरूआत कीनी। गंगापुर सिटी मांय 17 अर 19 साल उम्र ताई रा विद्यार्थियां री राज्य स्तर री नेटबॉल होड रो उदघाटन जिला कलेक्टर डॉ. अंजलि राजोरिया कीनो।

000

आयुष्मान भारत कार्यक्रम रा तहत बूंदी रा शहरी प्राथमिक स्वास्थ्य कल्याण केन्द्र मांय आयुष्मान सभा राख्यी ज्यी। इण मांय मुख्य चिकित्सा अर स्वास्थ्य अधिकारी डॉ. ओ.पी. सामर नॉन कम्प्यूनिकेबल डिजिज रा लक्षणां अर बचाव रा बारा मांय विगतवार जाणकारी दीनी। वे बतायो के डायबिटीज अर हाई बी.पी. रा मरीज नियमित तौर ऊं योग कर र, घूम-फिर र अर संयमित आहार ले र बीमारी माथे काबू राख सके है।

000